

四庫全書

史部

欽定四庫全書

史部

北河紀餘卷二

詳校官監察御史<sub>臣</sub>盛嘉祐

刑部郎中<sub>臣</sub>許北橋覆勘

總校官進士<sub>臣</sub>朱鈐

校對官待詔<sub>臣</sub>胡士震

謄錄監生<sub>臣</sub>吳貽棟

欽定四庫全書

北河紀餘卷一

明 謝肇淛 撰

市縣之北北河之南界也其縣為魚臺隸於兗南接夏  
鎮北達南陽皆新河也黃良諸泉入之其鎮曰穀亭  
魚臺春秋為魯棠邑隱公觀魚于棠即此漢為湖陵  
方輿至唐寶應初始改今名宋屬單州元屬濟州國  
初屬濟寧府後府降為州改屬兗州府縣治在運河

西南二十里 宋文天祥發魚臺詩晨炊發魚臺  
雨飛擊面團團四野周冥冥萬象變疑是江南山烟  
霧昏不見豈知此中原今古經百戰英雄化為土飛  
霧灑郊甸天寒日欲短遊子淚如霰 明四明陳沂  
憫魚臺水灾詩黃河水決衝漕渠直入青兗連淮徐  
魚臺單縣作巨浸洪流顧望茫無餘乘舟搖搖莫知  
所魚鱉民居漫無處扶疎草樹向高原彷彿菰蒲今  
沮如昊天不弔降荼毒已絕來牟仍菽粟漂泊無依

生理窮婦子流離向誰告昔聞洪水遭帝堯聖皇不  
讓唐虞朝九河失道有時治安忍鴻鴈聲嗷嗷中丞  
聞之動鳴邑幸免田租更施及氣息已盡仍復蘇相  
向歡聲皆歛泣勉強卒歲存餘生俯仰還期明年耕  
治水何人任深惻各以饑溺紓皇情 普暉題魚臺  
詩匹馬秋風別古棠小橋流水對斜陽卽卽亭毀貌  
猶去夫子堂空草木長甯毋江頭雲淡淡觀魚臺上  
月蒼蒼湖陵城與清涼院物換星移歲月忙

新河北自南陽南至留城凡百四十一里嘉靖四十  
四年工部尚書朱衡所鑿也先是河決華山出沛縣  
飛雲橋漫入昭陽湖運道湮塞自此河開水始不能  
為暴詳見河工紀 明厯下李攀龍呈朱司空新河  
功成詩二首重華冀北再開天益作山林涉大川四  
岳受成方貢日三邊仰給縣官年黃金不及隄形壯  
白馬長隨練影懸轉自流言能悟主老臣知遇兩朝  
偏 河隄使者大司空兼領中丞節制同轉餉千年

軍國壯朝宗萬里帝圖雄春流無恙桃花水秋色依  
然瓠子宮太史但裁溝洫志丈人何減漢臣功 吳  
郡王世貞詩二首日出烟空匹練飛大荒中劃萬流  
依連山盡壓支祁鎖逼漢疑穿織女機九道徵輸寬  
氣象六軍容物迥光輝甘棠欲讓金隄柳曾護司空  
却蓋歸 兩朝三錫璽書專自矢流言格上天功似  
玄熊官百揆渠名龍首帝元年飛艘雪擁吳都稻繫  
竿波穿少府錢長孺祗今稱社稷當時鉅野總茫然

吳興徐中行詩二首揚塵忽自阻神州紆策誰分  
聖主憂疏鑿九河唐伯禹轉輸三輔漢鄼侯天連河  
岳仍通貢地壓魚龍自穩流却笑漢皇臨瓠子負薪  
投璧不曾休 漂搖獨立衆言餘胼胝功成總不如  
隄築千金高鄭白艫銜百里蔽青徐玄圭已告開天  
績玉簡曾傳治水書更道史才司馬後濡毫還自紀  
河渠 銅梁張佳胤詩二首河溢當年警帝衷疇咨  
僉屬大司空濟川元仗商臣楫沉玉徒誇漢主宮萬



三如雲歸冀北千帆明月送江東清時何必綠封禪  
受計常思轉餉功一望中原氣象新九河如帶抱  
燕秦桃花水隱司津棹竹落隄餘太府薪乘橈三門  
飛練影褰茭兩岸白雲屯若論壁馬千秋事長孺徒  
稱社稷臣信陽王祖嫡入閘志喜詩春煖新渠靜  
不波夾隄楊柳映青莎錦帆三月離洪險白粳千艘  
入閘多足餉漫思唐相晏轉漕今有漢廷何至尊肝  
食從茲慰賑貸無勞議歲和閩中林爓經充郡新

河詩五首治水功成後分明德可歌數州人宅土四  
海貢通河 充土河新鑿春流漲接天抵疑銀漢落  
來遶岱宗前 種柳漸成陰他年總作林誰知築隄  
者辛苦土如金 且喜黃河治寧論白髮繁麒麟宮  
錦在先帝解衣恩 百萬軍儲足南風送去帆問誰  
能若濟帝賚是商巖 京山李維楨新河紀績十二  
首何年玄武赤符開砥柱中流萬壑迴莫訝禹功今  
可續司空原是濟川才 一自澄潭鎮石犀翠屏紅

樹擁金隄榮光萬里通淮泗流向仙陵作彩霓 錦  
纜牙檣百萬艘波光一望接天高黃熊為解崇侯憤  
白馬翻憐漢使勞 千山月色浸平沙岸芷汀蘭簇  
晚花銀漢迴瞻天北極仙郎從此泛仙槎 匣裏寒  
光躍太阿蛟龍無數匿深波只今津吏逢迎處夜聽  
鳴舷鼓柁歌 宛委山頭駕使車玄夷親授石函書  
河清欲待千年後不似功成二載餘 千尋竹箭排  
雲下萬疊桃花蔽日飛却憶當年王刺史乘隄猶賜

漢金歸 問俗三齊撫畫熊羆羊名節遠相同神河  
似解朝宗意一夜驚濤向海東 狂瀾豈借蘆灰塞  
洪水翻嗟息壤堙不是司空疏鑿遍何緣貢賦接天  
垠 懷襄復抱傲予憂淼淼東秦十二州一向淇園  
輸竹捷萬家烟火傍清流 一沉白壁通神貺遂有  
玄圭錫帝恩聞道黃河今似帶好從西北望崑崙  
三門九曲勢如狂此日安流一葦航應笑河渠書太  
史負薪却愧自宣房

黃良泉距縣東北四十五里出黃山下土中西北流入硯瓦溝閘河元頓舉有記詳見河源紀穀亭鎮在縣東二十里古濟泗合流之地一云甯母亭即齊桓公盟于甯母處元改今名置閘明太和羅正穀亭晚渡詩幽亭結構倚河流人待黃昏古渡頭萬頃碧波迷塞鴈一川紅照落江鷗風聲蕭索分漁火晚色淒涼起棹謳多少經過名利客不知明月上西樓

華亭沈愷次穀亭詩林靄橫蘭徑孤帆落野塘雨來

山樹暝風靜渚花香釣艇時能問村醪或可嘗白鷗  
知我意去住欲相忘

魚臺之北其州為濟寧其河為泗為汶為洸諸泉匯焉  
其鎮曰魯橋其蹟曰樊城曰邾婁城曰鄭均莊曰太白  
酒樓曰南池曰浣筆泉曰宣聖墨池

濟寧州古任國也漢為任城晉為高平宋為濟州國  
初置濟寧府後降為州屬之兗州府州治在運河北  
岸唐李白贈任城盧主簿詩海鳥知天風竄身魯

門東臨觴不能飲矯翼思凌空鐘鼓不為樂烟霜誰  
與同歸飛不忍去流淚謝鴛鴻 又離濟寧汎舟北  
行詩楊柳娉婷綠荷花旖旎紅魚遊華蓋底人在鑑  
湖中大白拈春酒輕衣受晚風龜蒙與鳬繹只隔片  
雲東 朱晁端友宿濟州詩寒林殘日欲棲烏壁際  
青燈乍有無小雨悵悵人不寐卧聽羸馬齧殘芻

文天祥過濟州詩借問新濟州徐鄆兄弟國昔為大  
河南今為大河北雲屯四萬里平原望不極百草盡

枯死黃花自秋色時時見桑柘青青雜阡陌路上無  
人行烟火渺蕭瑟車轍紛從橫過者臨岐泣積潦流  
交衢霜蹄破叢棘江南寒未深銅鑪獸花赤焉知行  
路人鐵冷衣裳濕元朱德潤任城南門橋詩任城  
南畔長隄邊橋壓丈水如奔湍閘官聚水不得過千  
艘銜尾拖隻牽非時泄水法有禁關梁夜閉妨民姦  
日中市貿羣物聚紅氍碧椀堆如山商人嗜利暮不  
散酒樓歌館相喧闐太平風物知幾許耕桑處處增



炊烟明朝北上別旅叟叟持清尊求贈言欲圖豐駢  
貞未暇為君寫作康衢篇 又過濟寧詩閭井皆臨  
牀郊原四望平橫峰連岱嶽分水向彭城笳鼓屯千  
騎舟車會兩京汭洄不能住俱是重王程 明廬陵  
楊士奇望濟寧詩踈翠輕紅水岸迂漁家遠近映菰  
蒲高城前望晴雲下却計行程是半途 長洲吳寬  
濟寧夜泊詩嗚嗚畫角語城頭暝色蒼茫倚舵樓古  
戍烟生人已散長河月落水空流異鄉信美非吾土

他日重來是舊遊千里鄉心孤枕上可能今夜夢刀  
州臨川聶大年濟寧懷湯叅將詩閭頭塵土污征  
衫河上垂楊礙去帆玉帛梯航通薊北石田茅屋夢  
江南九重魏闕心常戀千里鄉書手自緘却憶元戎  
油幕下幾時捫虱接清談江寧金大車濟寧道中  
詩西北風塵擁斷丘旅魂中夜鬱鄉愁漢廷未上孫  
弘閣濟水頻經太白樓候鳥翩翩迷遠浦輕帆颯颯  
帶春流十年來往青袍在贏得霜華滿鬢秋李楨

濟寧夜泊詩疎星斜月在扁舟寒鼓鼕鼕出郡樓最  
憶往年何處聽長安門外五更頭 壽張殷雲霄題  
濟寧圖詩太白樓前春水多南湖春老白蘋波白蘋  
波上風還雨欲採芙蓉將柰何 長洲皇甫沖暮至  
濟寧詩濟州城鴉啼暮天太白樓虛楊柳烟欲解吳  
鈎沽美酒無人同醉白雲邊 任城靳學顏安居東

望濟城詩平楚蒼然見十里驅車西出桃花底郡中  
樓閣霞作城湖上人家錦為水對此披襟宜進觴胡

為遠行自悲傷啼鶯百轉喚人醉垂楊千條拂苑長  
即今已是花如霰何處春光是故鄉 謝肇淛泊濟

寧城感事詩汶河南下勢憑陵一片孤城爽氣澄風  
飽布帆飛度閘雨腥漁艇亂拋冒春深水族家家市  
夜泊牙檣處處燈回首舊遊雲物異高樓蕭索不堪  
憑

泗水出泗水縣陪尾山下泉林寺南四源並出故曰  
泗水西南會諸泉水達於曲阜合沂雩二水從金口

壩入兗州出西門納關黨蔣詡七泉通於濟寧又合  
泲水至天井閘入運 唐李白金口壩詩水作青龍  
盤石堤桃花夾岸魯門西若教月下乘舟去何啻風  
流到剡溪 宋程企泗源詩泗源奇且恠聲勢各喧  
虬虎豹巖邊去蛟龍窟裏來稍流烟作陣初激雪成  
堆派必人疏導源應鬼鑿開乍深濤不起漸遠浪相  
催可把江心比嘗將海眼猜始微纔迸玉終盛忽奔  
雷澗為寒無卉丘因澗有苔已觀離竇側俄見過城

隈石勁崖難漱沙虛岸易顛邇雖逾濟漯遐亦到蓬萊  
洗鉢僧常至乘槎客未迴我從原際瞰誰自谷中推  
洶涌魯浮磬潺湲好泛杯狹窄容蟻穴湍可暴魚鰓  
劈華非天意排淮迺力哉傍如巫女峽上類楚王臺  
漏澤空神異襄陵但水灾林幽多鳥雀地僻少塵埃  
重愛茲佳趣題詩愧不才  
明長洲徐有貞泉林會泉亭詩  
靈源四出石玲瓏自與諸泉異不同誰道山中無水府  
只應地底有龍宮萬珠跳踴人聲合一

鏡澄明月影空好為導將千里去長流助我濟川功  
吳寬泗河詩四源合一水古河因以名望之渺千  
頃永日汪然清蕩搖鄒嶧山映帶兗州城餘波入漕  
渠資國功匪輕疏濬藉水部來往勞經營欲渡免舟  
楫石堰築且平臨流一縱步魚鱉不我驚即欲窮其  
源何惜此數程念昔洙泗間講業皆諸生河廣豈水  
然聖澤惟盈盈茲遊幸沾溉自慶非徒行浴沂效前  
哲春服亦既成四明邵莊陪尾泗源詩老龍橫穿

地維裂天吳移海來漏澤十派奔騰萬丈虹終古乾  
坤終不竭我來司泉過魯東馬蹄踏破春山紅頻向  
源頭探真趣乃知道體千年同會泉亭子聳孤秀愛  
我狂歌坐清晝渚聲激出耳底塵微甘洗却胸中垢  
秋來我欲朝明光謫才無補心蒼皇把取天瓢獻天  
子大瀉甘霖覃八荒 張祚遊泉林次石上韻詩問  
俗來山館停車憇古林蟬鳴秋樹杪龍隱石函深沫  
散浮珠彩流飛漱玉琴願言滌塵垢終日坐苔陰 宜



興張盛宿泉林寺詩山泉聲漱玉玲瓏到處看來  
總不同一竅直通龍子穴四圍長遶梵王宮穿巖映  
彩霞生漢落澗浮光月在空流入漕渠能利國就中  
疏導是誰功 天水胡纘宗過泉林觀泗源詩停車  
獨步泗源頭一曲源泉活水流瑤島翻雲爭日月銀  
河遶漢厯春秋潺潺石窟珍珠涌滾滾沙潭菡萏浮  
安得結茅泉上住放歌終歲看飛鷗 長洲馬玉麟  
泗水諸泉詩東土多靈泉勝乃在泗水屈曲山形轉

公舍叢林枳一溪諸竅通號呼瀉清泚珠濺百斛圓  
疑是驪龍趾聲吼徹林薄母亦虎豹壘白石何巉巖  
寒濤競靡靡色映羣木青光凝一潭紫玉膏澤我膚  
哀響醒人耳俯竇驚蟄雷激流知石髓道體固如斯  
國脉良在此 閩中黃鶴四泉林歌驪龍閒卧陰崖許  
戲弄珍珠不知數婪饞黑虎口垂涎豹突前頭歛相  
踞山童淘米臨清流驚見奔呼報寺主老僧洗鉢來  
降龍卞莊持矛欲刺虎虎豹咆哮龍奮爭涌珠散出

成甘露血流響水紅石巔腥氣上衝天帝怒下令六  
丁悉取將壓以巨石填幽阻神物精靈不可藏化為  
泉水賤賤注林深地僻少人知英爽時時吼風雨水  
部仙郎職運渠濟川無策心良苦旁觀林藪忽相逢  
憑陵大叫得其所天生地設遺吾儕舍此不用將安  
取決排壅滯力疏通導入濟漯踰淮泗汨沒多年喜  
得伸奮然效用酬知遇近漕國課上京華遠達夷琛  
獻天府更無冠佩混塵泥還有餘波到商賈施博功

高難自陳東馳直與東海處馮夷海若笑拍肩攜謁  
龍宮共尊俎鼉鼉擊鼓聲瑟瑟吳女持觴聲楚楚醉  
倒林泉卧不醒天吳紫鳳空延佇問傳遺事何人斯  
烏有先生善言語東阿于慎行泉林歌雷澤萬頃  
波澎湃如萬馬陪尾鎮之不得溢醜為龍瀆出其下  
洞門噴薄瀉流泉沸珠迸玉聲潺湲天山雪花四月  
落片片吹上春衣寒拍浮大白相對飲綠蘿作簞石  
作枕金潭百尺映文石熒熒細濯巴江錦行盡回溪

地轉偏疑是鏡湖春水旋深林蔽虧不見日但聞雜  
樹多鳴蟬樹裏泉聲百道重木根詰曲盤虬龍解衣  
羅坐泛流羽天光水色何溶溶遠峰隱見烟嵐滅殘  
霞飛丹手可掇此時林壑暝色來呼酒彈琴望雲月  
月上青山醉若何臨流垂手揚素波且謔白石吟淥  
水紅塵萬事空蹉跎日出高林送客子清風四面松  
聲起石橋一出到人間武陵桃花空流水 任城于  
若瀛遊泉林詩泉林久約已春深纔到泉林愜素心

自序曰 卷一  
往往尋源逢巨石時時倚樹聽幽禽孤亭倒映空青  
色曲竇翻騰太古音向夕臨流坐深壑便捐塵想欲  
抽簪 古吳陸化淳泗源詩靈源陪尾殆天開一脈  
勾連百道迴波面吐吞驚渤澥地中傾動自風雷禹  
功終古無消息元化何心任去來我欲浮槎到天漢  
只疑足下是蓬萊

汶水出萊蕪縣原山之陽會泰山徂徠諸泉流于堙  
城壩至南旺南下入運 明太原喬宇過汶河橋詩

九峰南望碧嵯峨  
汶水平添一丈波  
渡口客來休便  
過北山溪雨正滂沱  
長洲祝允明舟行汶上薄暮  
看月詩璇蓋瑩空青  
飛鑑泛華艷  
川原邈夷曠  
踈木媚寒漱  
廣路斷浮鞅  
旅翫諧清念  
迹逝偕志行  
萬里靡坊塹  
苟無忠宣持  
誰能勞不厭  
閩中鄭善夫汶  
上對月聞笛作商調  
命船人度曲為和  
因賦醉歌焉  
耆八月高風起  
鴻鴈羣飛渡  
淮水月下清砧愁  
遠人天涯芳草思  
公子王郎哀時最  
蕭瑟萬里迢迢向  
南

國呼我上船設冰鱠仰天傾酒開胸臆關山茫茫何  
處邊但見急管哀中天馮夷聽曲波面出楊柳亂落  
西風前酒酣月落歌未已隴思江情嗒然起未掛姓  
名玉策上願添海水金樽裏人生合歡那可測有似  
大海翻萍葉回首親朋各別離豈無江漢通舟楫流  
光過鳥不復駐達官好爵身之蠹況迺豺狼橫地軸  
何限驛騶窻天步竹林諸賢皆酒徒嗣宗只願步兵  
厨古來賢達一澌盡醉鄉之托今何如白水王謳



汶上泛舟詩山雨彌晦朔洪流奔巨川我來當此日  
舟濟喜晴天渡口淨芳樹人家生野烟孤城隱雉堞  
豐壤帶郊廛行潦及時降陰林或鬱然遙聽疊鼓發  
縱目雙旌懸廩祿身徒竊閭閻風未宣古人貴達節  
負弩奚稱賢又晚渡汶水詩天寒北風緊日落孤  
鴻鳴汶水秋浩浩凍雲凝不行餘霞散天際古木撐  
微明東來數峰秀紫草橫太清歲暮此為客感物傷  
遠情一麾在行役百年非久生顯晦冥有定憂喜交

相并疇昔玉京道，影塵翳冠纓。今茲值山澤，緬然懷  
令名。臨流自扼腕，偏為逝者驚。謝肇淛蚤渡汶河，  
詩霜飛月落，野雞啼霧鎖。長林水拍堤，夾岸人家寒。  
未起孤舟已過汶河西。上虞張文淵題泰安木頭  
溝泉詩：千里澄溝映碧空，穿巖赴壑濺溟濛。翠園新  
甫千章栢，玉立徂徠幾樹松。沮洳影紛虬，幹亂鬱蔥  
陰動石根通。東人莫道閒無用，排決終成濟世功。  
毗陵薛章憲泰山泉詩：泰山之溜直下五十里，傾崖

赴壑成川流不知何年鬼斧鑿日下滾滾無時休鯨  
呿鼇擲與石鬪琤然落礪鏗琳球銀河倒捲碧海立  
駿馬下坂鷹辭鞲盤渦斗絕涵倒景貝宮珠闕藏蛟  
虬飛流濺沫下噴千丈壑明珠百斛飄灑誰雕鏤先  
生解衣坐其下脫帽露頂涼颼颼兩涯不復辨牛馬  
手弄白日逍遙遊 攜李吳鵬龍港泉詩一水平分  
二水流徂徠山下更悠悠半竿釣破蒼龍影一葉凋  
殘碧樹秋持節柏松空自老忘形鷗鷺解人遊當年

莫道魚龍港盡入西風古渡頭 王謳舊堽城詩故  
城廢閘依然在千古興亡但劫灰一種傷心何處切  
西風空上釣魚臺

洸水汶之支也從堽城南官莊河入州境會沂泗二  
水入運 明河東薛瑄過洸河詩車轉香阿過遠山  
洸河一夕漲漫漫蛟鼉出沒蒼茫裏鷗鳥浮沉杳靄  
間浩歎每思臨逝水雄才長憶障狂瀾龍門魚躍波  
千丈便有風雲出濬湍 趙弼洸水詩岱宗何巖巖

萬古奠坤元有泉出其下實維洸水源東流幾百折  
經我踈籬門雨暗鳬鷺游月出蛟龍奔滔滔復混混  
無間朝與昏往過來者續道體於焉存臨風佇立久  
歎息無語言 吳鵬洸河詩北城西下古洸河一派

寒流蘚碧螺柳拂平橋搖旆影鳥吟奇語雜笙歌波  
心雲沒山光出渡口舟橫夕照多有客抱琴塵上卧  
醒來不見釣魚艇 胡纘宗飲蛇眼泉亭同張水部  
孟蔣二司詩秉燭覘蛇泉泉虛星滿天溪橋通市遠亭

榭傍城偏下榻憐平子開樽對浩然更催蔣詡至歌  
吹雜潺湲

魯橋鎮在州南六十里居民稠密商賈輻輳設巡檢  
司以守之有南州書院祀仲子路其兆二十里為仲  
家淺元周權過魯橋詩泗河汨汨流青銅魯橋突  
兀橫長虹驚波蕩潏石鬪怒石門空洞如弛弓風霜  
剝蝕勢欲壓亂石齒齒填深洪南連淮楚九地厚東  
導齊魯羣流通賈商貿易百貨阜來幡去棹紛奔衝

車輪彭轉鐸聲急馬蹄蹴躍塵影紅我遊天京偶經  
此一見淳俗真堯封扁舟膠涸守連日欲去未去心  
忡忡嗟予行役浪自苦颯颯吟鬢將秋蓬摩挲殘碣  
討遺迹搔首躑躅斜陽中銜杯一洗胸芥蒂信歌目  
送吳天鴻 楊敬德詩風色今朝好揚帆上魯橋林  
昏烟正積崖濕雨初消新岸綠青蔓平田長綠苗物  
華紛滿眼詩思坐來超 明大理吳懋詩忽見郵籤  
報水程客中無限故鄉情雲連翠巘尼山近雨過平

湖汶水清季札南來聊問俗仲連東去欲逃名難乘  
吾黨歸與興轉羨遲遲是此行 青社陳夢鶴仲家  
淺夜泊詩閘水經行處扁舟向晚通岸雲縈柳暗漁  
火射波紅地說南洲近人傳仲子風徘徊中夜起彈  
劍意無窮

故樊城在州北漢置縣屬東平國

邾婁城在州南十里春秋城邾瑕社預注任城亢父  
縣北邾婁城也



鄭均莊在州南十里均仕漢為尚書辭疾不出章帝  
東巡嘗幸其舍給祿終身時人號為白衣尚書今呼  
東鄭莊

太白酒樓在州南城上唐李白客遊任城縣令賀知  
章觴之於此後人因建樓焉并塑二公像為二賢祠  
唐沈光記有唐咸通辛巳歲正月壬午吳興沈光  
過任城題李白酒樓夫觸强者醜緬而不發乘險者  
帖繭而不進潰毒者隱忍而不能就其鍼砭搏猛者

持疑而不能盡其膽勇而復視其强者弱之險者夷  
之毒者甘之猛者柔之信乎酒之作於人也如是翰  
林李公太白聰明才韻至今為天下倡首業術正學  
天必賦之矣致其君如古帝王進其臣如古藥石揮  
直刃以血其邪者推義轂以輦其正者豈憑酒而作  
也憑酒而作者強非真勇太白既以峭直矯時之狀  
不得大用流斥齊魯眼明耳聰恐貽顛踣故狎弄杯  
觴沉溺麴蘖耳一淫雅目混黑白或酒醒神健神聰

銳發振筆著紙乃以聰明移於月露風雲使之涓潔  
飛動移於草木禽魚使之妍茂騫擲移於邊情閨思  
使之壯氣激人離情溢目移于幽巖邃谷使之遼歷  
物外爽人精魄移於車馬弓矢悲憤酣歌使之馳騁  
決發如睨幽并而失意放懷盡見窮通焉鳴庖太白  
觸文之強乘文之險潰文之毒搏文之猛而作狎弄  
杯觴沉溺麴蘖是真築其聰翳其明醒則移于賦咏  
宜乎醉而生醉而死余徐思之使太白疏其聰決其

明移于行事強犯時忌其不得醉而死生也當時骨  
鯁忠赤遽有其人收其逸才萃于太白至于齊魯結  
構凌雲者何限獨斯樓也廣不逾數席瓦缺椽蠹雖  
樵兒牧豎過亦指之曰李白嘗醉于此矣 宋文天  
祥太白樓詩高城蘸雲根聊可慰心跡長風萬里來  
如對騎鯨客監州好事者樹此樓與石隆鼻號金仙  
更長漫嗟惜 元陳儼太白酒樓歌公昔去兮乘龍  
宵雲氣兮蓬萊宮襟青霞兮佩明月橫四海兮焉窮

濟水兮無波泰山繚兮鬱嵯峨思故園兮神游恍臨  
風兮浩歌醉而生兮醉而死曩孰非兮今孰是千鍾  
百榼兮彼且奚適操一瓢兮吉且止擘春風兮折瓊  
芳援北斗兮斟桂漿浩冥冥兮徙倚以望歸來歸來  
兮舉我觴趙孟頫太白酒樓詩城廵當平野樓高  
屬暮陰謫仙何俊逸此地昔登臨慷慨空懷古徘徊  
獨賞心嶧山明望眼百里見遙岑陳剛中詩昔聞  
李太白山東飲酒有酒樓今我登樓來北風吹髮寒

颼颼太白天酒仙人間不可留金光絳氣九萬里翩  
然而上騎赤蚪左蹴大江濤右翻黃河流手舉北斗  
招搖柄瓊田倒瀉銀灣秋銀灣吸乾日月液蟾驚兔  
走黃姑愁太白方悠然掀髯送汀鷗炯如曉霞一點  
映秋水紅痕微涌玉波浮太虛變化如蜉蝣仙人何  
在不可求惟有胸中燦爛五色錦化為元氣包神州  
我欲起仙從之遊安得羽翼飛上崑崙丘 曹元用  
詩太白一去不復留任城上有崔嵬樓樓頭四望渺

無際草木黃落悲清秋  
鳬嶧挿天摩翠壁  
汶泗迢迢展空碧  
爭竒獻秀百年態  
作意隨人來  
几席諸老高  
會秋雲端  
金壁照耀青琅玕  
談笑不為禮  
法窘酒杯  
更比乾坤寬  
飲酣意氣橫  
今古玉山傾  
倒忘賓主  
謫仙人去杳何許  
異代同符吾與汝  
誰能跨海為一呼  
八表神遊共豪舉  
周權詩大羅仙人李太白  
秋水踈蓮浮玉色  
笑傲玉堂金馬中  
詩酒猖狂天子客  
飄飄豪氣秋風起  
登樓曾醉山東市  
放浪形骸宮錦袍

榮華富貴東流水酒酣揮灑翻河筆險語能令鬼神  
泣至今光燄照塵寰一字堪償雙白壁我來懷古空  
悽愴風月千年尚無恙何時相見崑崙丘汗漫從游  
九天上 明青田劉基詩小逕迂行客危樓舍酒星  
河分洸水碧天倚嶧山青昭代空文藻斯人竟斷萍  
登臨無賀老誰與共忘形 王猷太白樓歌金天精  
氣化長虹神遊八表無留踪醉挽姮娥向水底騎鯨  
盪倒馮夷宮吟魂浩蕩無處著散作酒星落城角城



角猶存舊酒樓碧瓦朱甍凌清秋俯瞰長河走飛練  
波濤洶湧東南流老我登臨慨今古天地沈淪一坏  
土前代衣冠掃電空謫仙去後吾誰與有時典却千  
金裘有時牽出五花馬呼兒換取盃酒來醉晚乾坤  
極瀟灑有時把酒問青天青天有月自何年有時把  
酒問明月明月在天幾圓缺玉井蓮開十丈花此段  
幽閒向誰說我欲思君去不還白雲漠漠連青山七  
十二峰在咫尺崢嶸巖障相迴環左迴環右挹抱惟

有雲山頗同調脫巾爛醉夕陽西獨拍闌干發長嘯  
吳門黃省曾詩浮雲引客思為我西南流酒樓春  
風生逝者中泉遊今朝綠蟻杯不到黃狐丘當年若  
弗飲白髮徒生愁我攜鸚鵡來笑無高陽儔鳳鳥不  
銜圖皇皇棲孔丘且吟王喬篇寄興瀛臺洲 華亭  
莫如忠詩縹緲層樓霄漢隈南城山色鏡中開不知  
仙馭遊何處長擬星辰謫上台林杪鶴巢珠樹遍日  
邊鯨負海濤來秦碑魯殿俱銷歇未覺浮名勝酒杯

南海鄭堯齡詩謫仙人去已千秋河水依然盡日  
流滿地濕雲生紫閣半天晴雨落滄洲名從白雪空  
詞苑興到青山買酒樓遙憶賀公能醉客齊名二老  
至今留 信陽樊鵬詩北地深秋得並遊振衣縹緲  
一登樓軒前落日江光盡榻外滄洲樹影浮萬里艱  
難看逐客一身飄泊有孤舟山川人事俱今古回首  
烟波極目愁 休寧吳錦詩太白天下士骭骭在塵  
埃萬言倚馬就豪邁振三台明主方見用羣小生嫌

猜不逢賀賓客誰識謫仙才同遊鄒魯國飲酒凌高  
臺八窗遺飛樓遠眺俯城隈殘碑橫蔓草文章翳綠  
苔風流千載下綿邈思悠哉 番禺梁有譽詩天寒  
霜雪繁日沒城上樓樓中謫仙人玉立娛清秋金龜  
換美酒醉脫鸛鵲裘玩弄清玉塵長揖謝王侯我來  
千載後萬壑風颼颼聞昔有丹鳳不與凡鳥儔朝食  
玉山禾夕宿崑崙丘銜圖將獻誰鳴聲鏘琳球始知  
空田雀飲啄徒啁啾營營嗤青蠅楚楚嘆蜉蝣請看

黃河水滔滔萬古流 汴人田汝隸重登太白樓詩  
二豪臨眺罷千古擅風流我輩同登日江山萬里秋  
風烟淮海色舟楫故園愁把酒斜陽外長歌憶舊遊  
南海歐大任詩狂歌采石月高卧謫仙樓珠斗當  
窗見銀河拂檻流朔風飄塞色羌笛入邊愁何處思  
公子蛾眉夜夜秋 謝肇淛同劉郡丞登太白樓詩  
醉倚高樓俯大荒憐才還共賀知章東來山色全歸  
岱北去河流半入漳平楚寒烟凝睥睨中原落日動

帆檣亦知信美非吾土塞鴈闌雲總斷腸 華亭徐  
階過賀知章宅詩汶水孤帆遠任城四望開風流賀  
監宅寥落李仙盃樹色含秋冷泉聲帶雨回金龜復  
何在忼慨有餘哀

南池在城東南即泚水經由停泓以入天井閘者有  
池蓄荷數畝唐杜甫與許主簿泛舟遊此 唐杜甫  
詩秋水通溝洫城隅集小船晚涼看洗馬森木亂鳴  
蟬菱熟經時雨蒲荒八月天晨朝降白露遙憶舊青

蘊 明武昌吳國倫南池蓮亭詩瀑水侵階上危亭  
背郭開分荷移小艇取石坐深苔地迥秋陰合軒空  
海色來誰能共心賞懷古正徘徊 信陽何出光古  
南池詩南池滄漭古城邊杜老尋幽不記年勝地一  
時留翰墨高踪千古重山川菰蒲烟擁留觴曲楊柳  
風牽載酒船日暮凭闌一長望伊人宛在水中央

桐城何如寵詩堤繞層城水遶廊憑虛臺榭俯滄浪  
春風桃李千門錦秋月芙蓉一院涼工部才名詩草

在水曹詞賦筆花香年來好事真成癖莫厭風流索  
酒狂 謝肇淛同劉郡丞遊南池詩高歌擊筑酒如  
澠天末西風濟水冰候鴈一聲秋嶂月寒星數點夜  
船燈池邊岸幘歸山簡草裏殘碑弔杜陵失路相憐  
且沉醉坐看北斗拂觚稜

浣筆泉在州東門外相傳李太白浣筆處嘉靖五年  
主事白旆築亭其上 明崑山吳擴詩良夜不能寐  
閒過浣筆泉獨看池上月空憶酒中仙落魄何為者



高風萬古傳臨流重搔首哀鴈下江烟 陳夢鶴詩

東泉七十二不及此泉清昔浣才人筆因傳學士名  
分池流桂月轉澗瀉壺冰誰識滄浪興吾今一濯纓  
宣聖墨池在魯橋閘下俗名硯瓦溝其水墨色有古  
碑刻云宣聖墨池 明新安程敏政詩一派泉聲出  
澗長千金猶帶墨華香源流色正分玄武刪述功深  
仰素王湘水有魚還識字滎河無馬復呈祥稽疑欲  
借圖經看斷港徘徊又夕陽

北河紀餘卷一

欽定四庫全書

北河紀餘卷二

明 謝肇淛 撰

濟寧而北歷鉅野嘉祥汶上三邑之境其河汶也其地為南旺分水為開河其湖為馬場為南旺為蜀山為馬踏其蹟曰獲麟曰闕亭

鉅野古大野澤春秋西狩獲麟其地也漢置鉅野縣唐置麟州宋元為濟州治國朝改濟寧於任城以縣

隸焉縣治在運河西八十里 明陳夢鶴春日泊鉅  
野火頭灣詩開棹移曹井迴灘向火頭人家縣岸口  
烟爨隔溪流寒盡春堤柳潮平野渡舟迷津誰欲問  
江海愧浮鷗

嘉祥古武城子游絃歌地也漢以後皆為鉅野境金  
置今縣屬濟州元屬單州國朝改屬濟寧縣治在運  
河西二十五里 明高郵汪廣洋舟中望嘉祥山詩  
放溜數百里悠然纔見山涼風吹雨過好鳥背人還

河水翻銀浪岡巒擁翠鬟不知幽谷底能得幾家閒  
汶上故魯中都夫子所宰邑也漢為平陸唐宋為中  
都金改今名元國朝因之縣治在運河東北三十五  
里唐李白登魯中都東樓醉起詩昨日東樓醉還  
應倒接離阿誰扶上馬不省下樓時又酬中都小  
吏攜斗酒雙魚于逆旅見贈詩魯酒琥珀色汶魚紫  
錦鱗山東豪吏有俊氣手攜此物贈遠人意氣相傾  
兩相顧斗酒雙魚表情素雙鯉呀呷鬚鬣張撥刺銀

盤欲飛去呼兒拂机霜刃揮紅肥花落白雪飛為君  
下筯一餐飽醉著金鞭上馬歸 明四明陳東過汶  
上詩古汶棲靈地孤城水上依昔賢懷此隱今我去  
何依遺風邑里秀落日稻杭肥羈眺傷來往空嗟人  
代非 王謳汶上道中詩孤遊來汶上歸思滿秦中  
水泛山城雨花殘野樹風行人尋魯道落日向齊宮  
茅屋應如昔傷予類轉蓬 又汶上公署詩兩鬢如  
蓬行路難高秋風露宿臺端雲藏畫角青山暮月轉

空城碧樹寒為客數年非樂土舊遊何日是長安獨  
留三尺齊門缺猶自狂歌醉裏彈 吳國倫過汶上

贈韓尹詩中都文物古來傳問俗新知茂宰賢海上  
峰陰邸子國城頭沙合汶陽田歌聲已傍千花動詩  
思翻從五柳懸孤署細論心並折不知明月落尊前  
南旺在濟寧北九十里其地特高汶水西南流至此  
四分南流達於濟寧六分北流達於御河有分水龍  
王廟禹廟及宋尚書祠祀宋禮 明劉基南旺守閘

詩客路三千里舟行二月餘壯顏隨日減衰鬢受風  
踈蔓草須句國浮雲少昊墟愁心如汶水蕩漾遶青  
徐 餘姚謝遷南旺分水詩南旺湖通黑馬溝濟南  
汶北兩分流淵源直自徂徠出珍重前人為國謀

程敏政分水詩二首濟水潺潺向北流濟河灕灕向  
南流官船私舶都過此南來北去幾時休 龍王廟  
前石作堤馬頭灣脚路成泥莫笑水流分彼此只緣  
地勢有高低 殷雲霄南旺道中詩夜雨既過無塵



土芳草微烟亦可憐  
白雲欲共青山遠  
鷗鳥似矜湖水妍  
平生事半風塵裏  
兩年歸俱清明前  
楊柳岸頭春幾許  
與君沽酒問漁船  
上海陸深南旺水  
澁舟不得去  
同行者謀就陸戲成  
自慰詩春江多柳花  
風起花還飛  
夕陽歛飄蕩委地相  
因依行止諒有數  
早暮同所歸  
百年總行旅  
安用長歔歔  
義和無東回  
安樂誠幾希  
眇焉泣岐子  
人遠事已非  
飄飄山水間  
志願良不違  
朝多清風來  
暮多繁星輝  
古稱太史公  
千

載欽嘉徽 王謳南旺公署詩何處忘形好官齋似  
此稀地幽還獨往日沒竟忘歸荷芰香堪製湖魚味  
可依隱居誰更卜在世亦忘機 淮南宗臣南旺湖  
夜泊詩秋日孤舟下石梁蒹葭寒色起蒼茫青天忽  
墮太湖水明月長流萬里光中夜鸕鷀迴朔氣南來  
鴻鴈亂胡霜他鄉歲暮悲遊子涕洟時時滿客裳

皇甫冲過分水望泰嶽詩神岳既蔚奧靈海亦盤紆  
金文秘漢簡玉冊藏秦符帝草日月光宮樹雲霞敷

蒸石發靈泉播流為川渠皇心諒有眷造明開神都  
北逝溢聊濮南奔潤豐徐貢至充大盈漕來悅王途  
疏導底巨績玄理非人謨茲貺信可封願上長卿書  
清江教英過分水有感詩龍舟前日往來輕邊馬  
蕭蕭兩岸鳴顛顚會通河上柳至今猶自怨南征  
謝肇淞南旺挑河行堤遥遥河瀾瀾分水祠前卒如  
蟻鶉衣短髮行且僵盡是六郡良家子淺水沒足泥  
沒胛五更疾作至夜半夜半西風天雨霜十人九人

趾欲斷黃綬長官虬赤鬚北人騎馬南肩輿伍伯先  
後恣訶撻日晏喘汗歸蘧蔭伍伯訶猶可里胥怒殺  
我無錢水中居有錢立道左天寒日短動欲夕傾筐  
百反不盈尺道傍濕草炊無烟水面浮冰割人膝都  
水使者日行隄新土堆與舊崖齊可憐今日岸上土  
雨來仍作河中泥君不見會通河畔千株柳年年折  
盡官夫手金錢散罷夫未歸催築南河黑風口瓊  
山丘濬題來尚書祠詩清江浦上臨清閘簫鼓叢祠

飽餒餘幾度會通河上過更無人說宋尚書

開河在南旺北十五里其地每歲以十月下旬為市

集百貨聚焉元至正間置閘明永豐曾啓舟次開

河同胡祭酒鄒侍講登岸散步長林詩芳晨藹新霽

弭楫長河曲睠茲丘園趣褰裳涉平陸郊原渺空曠

竚望舒遠目村中夜來雨土脉高且沃茅廬雞犬靜

日出烟樹綠牛羊散平野隔水見樵牧麥深雉初雉

桑柔蠶已浴老翁多懽顏生事一云足偶茲一留憇

幽境愜所欲僕夫戒前征迤邐出林麓緬想塵外踪  
於焉恣遊矚 胡儼汶上開河與仲熙子啓登岸散  
步詩逶迤陟長坂攝衣披草莽遙見村落中綠野平  
如掌秀麥苗已交柔桑葉漸長雞犬適閒曠牛羊遂  
生養欣欣物自私春光正駘蕩緩步隨東風林花飄  
惚恍朝耕土脉濶午炊孤烟上草屋十數家幽棲亦  
蕭爽童稚訝衣冠車馬絕來往田夫鉏耨歸村春隔  
林響依微輞川居悠然快心賞 詹瀚開河迤南即

事詩憶昔長垣昏墊日曾經沉壁奠張秋梁山忽斷  
陶祥路鉅野還浮曹濮舟千里民居今底定十州麥  
壠近全收黃陵岡塞河循舊黑馬溝深水自流開  
化方豪開河詩二首三月開河驛垂楊綠覆堤征人  
歎蕭索未有一鶯啼開河河不開萬舸在平地海  
市不得觀見此河中市王謳開河小憩詩棄繻策  
已建持節罷還新水驛留停午山花紀暮春烟光寒  
際草風色晝迷津異國傷愁眼偏勞作官人

馬場湖在濟寧州西十里北接蜀山湖蜀山之水溢而入之萬歷間尚書潘季馴始建閘築堤壩千餘丈以備蓄泄湖周圍四十里

南旺湖在漕河西岸縈迴九十里即鉅野大澤東畔也宋時與梁山灤水匯而為一圍三百餘里即宋江所據梁山泊也及會通河開畫為二隄漕渠貫其中湖多菱芡魚鼈之利夏秋間荷花滿湖笙歌遊舫有江南之致 明古田張以寧梁山灤詩風正吳檣去



不牽雲融汶水綠堪憐  
旅蒲渺渺官為市楊柳青青  
客上船 謝遷詩湖水經秋分外清  
順風南下片帆輕  
尋源不盡平生興翹首萊蕪咏濯纓

蜀山湖在東岸即南旺東湖也周回六十五里有山  
一區在水中央望之若螺髻焉曰蜀山蜀者獨也山  
上有聖母祠云是伏羲母未知何據舊有唐老子宮  
及大佛殿今廢 明錫山龔勉同胡水部招遊蜀山  
詩乘暑來湖上炎蒸苦未休水部興不淺相約蜀山

遊挂席烟波裏  
艤棹雲谿頭  
湖心得小島  
散步登林丘  
青山樹外見  
碧浪坐間浮  
攜尊就佳蔭  
風生水面秋  
頓令暑氣遠  
滌我塵襟幽  
少焉月初出  
清光蕩中流  
天宇一何濶  
胸次俱悠悠  
陶然共往返  
恍疑在瀛洲  
懷寧於惟一  
詩為愛湖山  
景攜朋集小  
船浮雲移水  
底野鳥集灘  
前漁笛迷烟  
弄僧鍾隔樹  
傳維舟依古  
木躡磴訪幽  
禪謝肇淛冬  
日同李元祉  
水部遊蜀山  
詩一水劃為  
三兩湖東西  
滙漕渠貫其  
中盈

盈若衣帶西湖漸成陸東湖淼無屆千頃碧琉璃風  
雲互變態中流一卷石突起砥澗泮金鏡浮芙蓉銀  
盤捧螺黛荒祠久零落花檣皆破敗雞柵倚龜趺燕  
泥凝佛背開尊面南浦雲水澹相對漁艇散復集鳴  
榔出深瀨蒲苳交亂流帆檣遶天外濤驚山影搖波  
漾日光碎恍如金焦間疑在蓬壺內憑虛倏往還已  
隔人天界浮生何時閒勝遊與君會回首空烟波踈

鐘隱林霽

馬踏湖在汶河隄北漕河東周回三十四里其上有

釣臺

獲麟渡在嘉祥縣境漕河傍地名大長溝上有坊云

獲麟古渡 明薛瑄詩使旌兩駐獲麟臺秋色蒼茫

積雨開一帶青山連縣郭數家茅屋接蒿萊山川自

昔曾呈瑞鄉邑于今豈乏才却愧白頭巡歷遍使人

寧不重徘徊 華容孫宜詩渡古寒烟積沙明落照

懸春秋悲鳳日天地泣麟年魯變時交阻周衰轍竟

旋至今留絕筆真意更誰傳

闕亭在南旺湖中高阜六七春秋桓十年會于闕是也魯自隱桓以下皆葬於此至今水際時見烟雲樓臺之狀

開河迤北東平東阿壽張陽穀四州邑之境也其地為安山為沙灣為安平鎮為荊門為阿城為七級其湖為安山其蹟為挂劍臺為戊巳山為黑龍潭為阿井為桃丘為釣臺為金堤為龐涓井

東平春秋須句郕鄆宿四附庸之國漢置東平國唐  
為鄆州宋元為東平府國初降為州屬濟寧後改屬  
兗州治在運河東北十二里 唐高適東平路作三  
首南圖適不就東走豈吾心索索涼風動行行秋水  
深蟬鳴木葉落茲夕更秋霖 明時好畫策動欲干  
王公今日無成事依依親老農扁舟向何處吾愛汶  
陽中 清曠涼夜月徘徊孤客舟渺然風波上獨愛  
前山秋秋至復搖落空令行者愁 又東平路中

大水詩天灾自古昔昏墊彌今秋霖霖溢川原頌洞  
涵田疇指塗適汶陽掛席經蘆洲永望齊魯郊白雲  
何悠悠傍沿鉅野澤大水縱橫流蟲蛇擁獨樹麋鹿  
奔行舟稼穡隨波瀾西成不可求室居相枕藉鼃黿  
聲啾啾乃憐穴蟻漂益美雲禽遊農夫無倚著野老  
生殷憂聖主當深仁廟堂運良籌倉廩終爾給田租  
應罷收我心胡鬱陶征旅亦悲愁縱懷濟時策誰肯  
論吾謀 宋文天祥東平館詩憔悴江南客蕭條古

鄆州雨聲連五日月色徹中流萬里山河夢千年宇  
宙愁欲鞭劉豫骨衰草暗荒丘 明南楚廖道南發

東平詩粵從神禹聖濬川防冀州碣石鎮瀛島差我  
鬱蛟虬東原既底平百川皆東流海若鼓飛瀾川后  
時出遊世邈古道湮滄桑復誰謀泊元創運道鑿渠  
引龍湫移山奔巨靈填海潛陽侯皇明御天軌百神  
翕懷柔漕輓聯巨艦不必勞車牛祇役泊茲土日夕  
烟光浮津吏候沙渚簫鼓下中流逝哉藉罷靈良



士彌休休 薛瑄曉出東平詩憲節凌秋發城門逼  
曉開溝長流水去野曠遠風來跋馬橋頻度看山客  
屢回川原行未已齊魯望悠哉漢檢天門石秦碑海  
岸臺曠烟橫曲阜旭日上蓬萊遺蹟懷前古觀風慰  
好懷衢樽須共飲井稅不煩催每見桑麻野深期杞  
梓材行歌方自得前陟更崔嵬

壽張春秋良邑戰國為剛壽漢置壽良縣光武避叔  
父諱改今名元屬東平路國朝因之縣治在運河西

三十里

東阿春秋為齊邑莊公十三年盟于柯即此歷漢至  
唐俱屬濟北後改屬鄆州元改鄆為東平國朝因之  
洪武初以水患徙治穀城即今邑治在運河東六十  
里 宋文天祥發東阿詩東原深處所時或見人烟  
秋雨桑麻地春風桃李天貪程頻問候怯馬緩加鞭  
多少飛檣過吁嗟是北船 明四明萬表過東阿答  
嚴水部詩別君荆門道重會山東阿別時初履霜堅

冰今渡河微勞不自慎積困成沉痾衝寒枉遠駕攜  
觴列清歌眷眷此交情一顧豈在多

陽穀春秋齊地僖公三年會于陽穀即此秦漢為須  
昌縣至隋析置今名唐屬鄆州元改鄆為東平國朝  
因之縣治在運河西四十里

安山在開河北六十里置閘以安民山故名山在州  
西南三十五里山半有寺上有甘羅墓 明皇甫冲

安山道中詩泊舟安山北忽見山南船銜尾若魚麗

鈺鼓紛喧闐樓櫓樹干盾笈插戈鋌琕弓赤羽箭  
朱旗當檣懸長年盡紅巾抹額絳絲纏言與羣盜鬪  
僅不為摧殘請看身上創衣血何新鮮聞之不敢進  
倚棹生憂煎載聞持節使提兵邏河壩脫者有重聚  
獲者無幸全哀此封中氓棄擲潢池間雖云饑寒故  
信也誰為宣懷保道不足政刃皆深淵服妖古所畏  
涓涓乃滔天巢角鑒不遠此理庶可研 又安山坐  
聞詩客行貪利涉流水鎖重關津吏惟高卧征人盡

損顏纒紆青草際檣寄綠楊間縱有分風送那能任  
往還 徐階夜行安山道中詩木落山蕭蕭殘燈照  
寂寥病驚時日暮愁厭客途遙急澗聽逾響荒村語  
不露月明如有意深夜伴歸橈

沙灣在張秋南十二里黃河舊決口也弘治間塞黃  
陵岡口有裏河一道由鄆城來逕壽張黑虎廟至此  
入漕

安平鎮舊名張秋春秋為衛地秦漢以來為東阿壽

良穀城三界之地或屬濟北或屬東平柴世宗時遣宰相李穀治隄自陽穀抵張秋口鎮名昉此來改為景德鎮國朝弘治七年塞決河功成賜鎮名曰安平抱河為城北河都水郎中治之其地仍為東阿陽穀壽張三邑邊界云 明于慎行安平鎮新城記國家漕會通河設工部分司於故元之景德鎮以掌河渠之政令即今所謂安平也安平在東阿界中枕陽穀壽張之境三邑之民夾渠而室者以數千計五方

之工賈駢堅而帶驚其中齊之魚鹽魯之棗栗吳越  
之織文纂組閩廣之果布珠琲奇珍異巧之物秦之  
屬耗晉之皮革鳴櫓轉轂縱橫磊珂以相灌注而取  
什一之贏者其屢以數百計則河濟之間一都會矣  
往天順弘治中河決其西絕而入濟徐武功劉忠宣  
二公皆總十萬之徒聚諸道之錢穀以來有事於茲  
土至建祠築宮以比於宣房瓠子之役地至重矣而  
無城以域民封圻之吏畫地而守之往議者蓋數數

置籌策焉萬厯戊寅大中丞汝陽趙公實撫東夏既已考憲修令吏人烝烝祇若休德罔敢不虔於是巡行郡邑問民疾苦過安平而昭之乃進三道大夫謀曰天子申勅中外惟是城隍之守以勤下吏吾等幸而從事以是地之在河隄而民無所庇以守即有後事敢毋與知大夫其圖之三道大夫出而謀諸三邑之長三邑之長屬吏民而告之故咸曰不忘一二氓庶憫其露處而賜之垣墉使有所扃鑰以居敢不惟



力公乃與侍御常熟錢公議之錢公欣然協謀亟下  
記道府謹若中丞公命於是使城之城方八里高二  
丈五尺其下厚四丈其上銳四之一四門各樓四角  
亦各樓凡用夫三千五百名鎮之民居其四三邑取  
六馬銀三千七百餘兩東阿居其六東平若二邑取  
四馬厥制跨河而環之水之所出入皆為臺櫓狀如  
兩玦而華閣飛梁橫亘其中琳宮璿題巍峙其左煌  
煌乎漕渠之巨觀矣城且竣公以少宰召入而大中

丞內江何公繼之躬駕往視以終厥功侍御忻郡陳  
公亦至相與陳之法紀以授守吏於安平士民鼓舞  
謳吟永奠厥居而史于生以為此非一方之利也國  
家都燕冀仰東南四百萬粟以給長安惟是一衣帶  
之水曾不容舠以綰億萬年之命脉自江淮以北每  
數百里之中各往往有名城大都聚五方之貨賄以  
為公私之所頓置而安平以一聚落居臨清濟寧之  
間十得四五焉辟諸人之一身其血脉上下周流乃

至於腠理支節之處則疾之所由入而國工之所操  
鉞而取也此之為要害豈惟是一城一邑之所庇賴  
天下幸而又安即有灼見遠覽利害較然朝不及夕  
難以動衆勤民逡巡卻步幸少斯須以為持重迨其  
有緩急索而圖之嗟何及矣深哉易之言重門擊柝  
以待暴客蓋取諸豫夫豫者先事而早計之武功忠  
宣二公奠乂此土控制南北俾國家有漕渠之利而  
公為之形勝以固其防俾國家無漕渠之憂皆所謂

豫也往正德中羣盜流劫且徧齊境不能扶一城之  
鑰而安平市里實居然有封豕雄虺之跡以驚父老  
假令少淹朝夕廟堂南向而籌安能忘此一衣帶水  
此不先事而早計之效也故豫之時義大矣哉城之  
成也史于生在邑里公使記焉 謝遷安平譙樓記  
安平鎮舊名張秋隸兗之東阿實當漕河要衝之會  
民夾東西岸而居者無慮數千百家岸西有譙樓置  
漏刻角鼓以正節候以警晨昏以示民之作息樓之

下凡商賈販息日中為市者皆歸焉弘治癸丑河  
決東岸運道幾絕上亟命重臣往治之於時漕舟牽  
挽者率就西而西岸摧剝已久樓並河甚逼行者迂  
迴以趨乃議撤樓以便往來牽挽許河平而復已而  
執事者悉力決口急於竣事以復上命樓未暇及也  
越八年關西韓公廷器以右通政來嗣河事始議修  
築西岸疊石以固其外延袤凡五百有餘而樓亦遂  
重建焉從民志也規模閎壯於昔黜陟丹雘行煥然

一新於是達巷市肆悉復其舊居民漕卒行旅商賈  
各遂其宜咸忻忻相告謂韓公之功不可忘也監察  
御史平陽秦君昂嘗知東阿縣事請予文記之嗟夫  
物之成毀固以時為重輕而興墜舉廢之功則未始  
不存乎其人也方河無恙時樓固一方之望其所係  
亦重矣不幸河流告變墊溺是懼救災捍患日不暇  
給則斯樓之存亡甚輕故撤而毀之若棄敝屣耳及  
夫河靈順軌挽道復故則其所係於一方者固在功

豈容於久廢而羣心之望豈可久孤也哉然非韓公之明足以識時才足以集事則斯樓之復亦豈易言哉況望其有加於昔哉韓公之功於是為大矣抑古之人重用民力義所不當者雖微必謹其於所當為者雖大不恤故延廢之新南門之作以及一臺一園之築夫子悉書於春秋以示戒至於修泮宮復闕宮之役則詩人頌其事而夫子刪詩特存之以示美斯樓為民而復固政務之所先其亦泮宮闕宮之類而

安知無頌美其事者邪記以示後予固不得而辭也  
四明楊守陳張秋賦駕舫艫以南邁兮經齊魯之  
故疆何石堤之巋吾目兮夢千里之垂楊顧僕夫以  
咨問兮曰兗郡之張秋曩河決於此地兮奔滄溟而  
橫流漫黍稷之方疇兮奄千頃為一壑渺風濤其洶  
歟兮拊虬龍而舞蛟鰐民居蕩析兮舟楫沉淪嗟彼  
河伯兮一何不仁貪婪百川兮吸濟沈而吞汴漕渠  
寢涸而將涇兮僅涓涓其如綫萬艘鱗集以櫛比兮



悲膠杯於坳堂壅萬國之經絡兮撫兩京而搯其吭  
堯以降水為誓兮咨伯禹其焉在共與鯀而相承兮  
幾精衛之填海捷石菑之鉅萬兮付一髮於燿燼役  
夫續其荷鍤兮倏皆化而為魚河與歲而偕逝兮公  
與私其同窘日筆管掎克以感民於流亡兮有人心  
其誰忍幸河流之他徙兮築新堤其若墉乃售偽以  
叨榮兮自詫纂禹之神功若強敵之負固兮師老財  
殫而弗克俄大醜之自殞兮溢刑誅以為口實嗟彼

偽之一售兮志淫淫其溢逞再售而邦其殆喪兮卒  
自歸於陷穽歎世時之每下兮紛售偽其日繁戮懷  
中之赤子兮謂剪狄而平蠻朝捷書之方奏兮夕羽  
檄之已翔曾不若張秋之一築兮歸至今其猶固吾  
恐衆偽之茲售兮將百吡之並罹羣蟻穴其不塞兮  
潰千仞之長堤倚危檣以曾思兮涕潛潛其若霰顧  
四海之在念兮於張秋乎奚歎 李東陽過安平鎮  
懷劉司馬詩黃陵岡頭河水黃衝沙走石聲礪礪北

趨平原下廣澤直壞運道無津梁坐令漕舟百萬如  
山壅民船賈舶何紛龐帝遣臺臣出治水水性津碨  
難為降千金作埽萬夫力頃刻下墮輕豪芒臺臣焦  
思廢食寢夜夢神禹授以玉簡青琳琅水行在導不  
在障豈以木石爭濤瀧地靈順軌水恠伏河遂南徙  
歸徐方因高為陵下為澤復有石壩磊犖長如岡豐  
功偉績不可以數計此乃餘力非末強憶昔文皇建  
都向燕薊中導汶泗通漕綱尚書宋公富經略世上

但識陳恭襄武功徐公何人亦奇士盛以勲績為文  
章四十餘年復一決嗟此之績安可忘帝念儒臣分  
書刻金石此記正屬臣東陽使輶東來一登眺風日  
颯爽炎天涼是時臺臣入兵省我在江湖思廟廊願  
岡不隳河不徙縱有帶礪無滄桑皇甫冲過安平  
鎮詩武功鎮略雄取日升虞淵功成身見疑竄跡投  
蠻烟憶昔奉皇猷秉旄治頽川神人授龍欲懋績河  
隄篇妙靈自有協漢壁何須捐新防若崇墉故水流

潺湲堂皇漕貢途天子稱萬年  
錫山秦旭過張秋  
次韻詩漢朝河決自元封未抵張秋一倍功百辟祝  
神沉白馬萬夫持畚截長虹風雲久護坤靈黑草木  
遙連海氣紅詞客經行思無限坐看江漢自流東  
臨海王士昌張秋舟中喜逢謝在杭賦贈詩當時嚴  
譴赴黔巫詞客如雲別酒鑪玄玉君垂蒼水佩白頭  
余戀步兵厨交情豈問音塵隔世事真堪涕泪俱歸  
思秋風共蕭索東行應只為蓴鱸  
新野馬之駿寄

張秋謝在杭水部詩懷人雲樹阻江東一札三年未  
可通墨氣想流春草後鑪薰如坐水聲中河渠太史  
書堪續省署何郎字略同衣帶到吳應不遠估船無  
賴托郵筒 謝肇淛送沈季彪治水張秋詩春風擁  
傳出京華汶水梁山護建牙河伯無波侵瓠子詩人  
有閣對梅花閉門過客時妨卧行部移舟半作家轉  
餉河源憂不細豈同博望遠乘槎 又赴張秋詩本  
無寥廓志甘作支離形乘槎意不遂風波殊未寧挂

席下潞河回首燕山青殘冰觸柔櫓宿莽迷寒汀天  
津片月落海氣何冥冥迢迢涉濟漯擊汰揚芳艍孤  
城河之干飄若水中萍幸無簿牒擾吏散門長扃邊  
邑錯三五落落如郊坰山水多清暉亦足娛心靈天  
步苟如此幸不獨為醒 又入安平署詩二首謾說  
皇華署淒涼似遠藩抱河雙半郭錯壤一孤村帆影  
晴侵戶郵籤夜到門盈盈衣帶水不必問河源 偶  
罷含香直來乘奉使槎晨叅津吏集秋雨石堤斜客

過時鳴鼓官閒早放衙舊遊渾似夢重到便為家  
又登安平譙樓詩高樓遙控九河關海岱微茫指顧  
間千里飛帆衣帶水半窗斜日錦屏山孤城粉堞連  
雲起平楚蒼烟逐鴈還氛祲坐消波浪息風光贏得  
獨開顏 閩中徐煥贈張秋謝在杭治河詩使者分  
曹治北河應知瓠子不興謠既憐驛路攜家遠又苦  
官船過客多屐到東山登小魯膠和深井煮名阿倖  
錢莫惜抄書籍雙眼將花柰老何 天長陳從舜送



謝在杭治河張秋詩雪花如席壓層城忽捧天書出  
漢京亦有玄夷稱使者偏從水部盛才名狂瀾自合  
迴川后沉璧無勞厯聖明歲暮祗憐知己別臨風那  
不重關情 閩中陳鳴鶴初至張秋詩浪迹風沙倦  
停車寄水村蘑菇山簌旨毳褐野裘溫北禮從宗國  
南冠識故園還應登泰岳絕頂望吳門 又張秋公  
署贈謝在杭詩幾年南北悵離羣此日桃丘鴈獨聞  
耽寂不辭都水使著書寧數漆園君粟行與府聯青

崔吏散公庭長白雲入幕不堪閒似病朝朝揮麈到  
斜曛 莆田郭天親送謝水部往張秋詩風塵為客  
久一再送君行當此看花候那堪折柳情維舟臨古  
岸分署坐孤城人事逢迎少應高水部名

荆門驛在鎮城北隅而上下二閘在鎮北十餘里又  
有荆門寺在鎮北十五里荆門鋪在鎮北九里 明  
金華王禕荆門詩一首任城北行三百里官樹如雲  
夾河水樹深水淺船行遲五日纔到荆門西荆門津

吏不開閘前船後船似鱗櫛名驅利逼貪途程落月  
在地登車行吉水周述上荆門閘得風詩我辭京  
國遊鄉土官船十日南風阻客程空自算歸期誰識  
愁懷此事苦閘河忽遇水波平高幡直挂長風輕風  
幡去若飛鳥疾飄飄何異昇天行南船今日誰可比  
心似北船昨日喜陽穀李際元荆門詩鼓角催清  
曙樓船漾碧流使星穿柳急野焰入雲浮雞犬隨人  
亂旌旗傍岸稠皇華無遠邇此地共咽喉南海盧

雲龍荆門驛詩草綠荆門柳更濃別來霄漢一萍蹤  
餘寒四月衣初裕落日孤舟路幾重千里帆檣新禹  
貢百年耕鑿舊堯封美人自古傷遲暮回首天涯可  
易逢

阿城在張秋北五十里即齊阿大夫所治邑也今為  
市集魚鹽貿遷商賈輻輳置有上下二閘夾岸而居  
者千餘家 明謝肇淛阿城詩荒隧宿寒烟蒼颯竄  
撮粟行人畊廢坂牛羊下頽壁百里有遺墟芳草無

阡術子奇昔為政同載皆耆逸銷兵作農具制挺撻  
強敵惠愛流嘉聞丘壑存遺蹟云胡阿大夫揮金事  
交暱譽言雖日聞卒自膏鑊鎖井邑故不殊善敗迴超  
軼悠悠千載事誰復論名實驅車再三歎西風動蘆荻  
七級鎮在阿城北十二里古渡也元時置上下二  
閘 明李際元詩渡古遊人穩津湍舟子招綠垂  
楊柳密紅映蘋旄飄水趨瀛洲急途分江漢迢前程  
經險盡此地可魂銷 陽穀柴世需詩浩渺七級水

渡船渡人行試問蓬瀛路茫茫隔幾程

安山湖在東平州西十五里漕河西岸紫涸可百里  
繞安民山下四面有隄置閘以時蓄洩謂之水櫃歲  
久填淤民多芟牧其中萬厯十六年始復舊制 明  
東平劉爾牧安山河上登千佛閣詩莊嚴寶閣枕河  
流龍象開成南部洲金剎倒搖波影動天花穠接水  
光浮風塵迥出三千界雲氣如登十二樓坐對孤烟  
登樹杪懸知暮磬度林丘

掛劍臺在張秋城南河東岸後有徐君墓相傳吳季  
札聘齊過徐君返而掛劍處也墓前有祠並祀二賢  
有司春秋致祭臺左右生草曰挂劍草一正一斜若  
負劍然能療人心疾今按泗州城北徐城亦有徐君  
墓未知孰是也 春秋徐人歌延陵季子兮不忘故  
脫千金之劍兮掛丘墓 元都水監丞滿慈記季札  
掛劍事載於史世次備見於春秋遂索其略昔季聘  
魯過徐徐君好季札劍弗言季札心知之為使上國

未獻還過徐徐君已死遂解劍繫之徐君冢樹曰始  
吾已心許之豈以死背吾心哉夫徐君為人無傳可  
致觀季札心交以信槩可見矣冢在景德故鎮之南  
百舉武惟地叢草蔓延形皆肖劍土人以掛劍名之  
或云冢在泗州今按此地古有碑刻季札掛劍徐君  
墓樹八字昔人已嘗訪其墓而封樹之又從而歌詠  
之故老相傳必有所據愚不復置辯嗚呼春秋之際  
世不知義而以權利相軋雖齊桓晉文輩亦以力攘



奪而成名況其下者乎季子之於吳有可取之義遜讓守節棄而逃之其視當時豈不萬萬相懸者哉觀

其墓子羸博恩不累其志引

闕避楚名

闕

掛

劍於墓死不背其心孰謂一劍之誠化異草而旌信過之者式

闕

藏於魚腹以逞堀室之凶舞於

鴻門以快沐猴之怒者不啻天淵也元至正十三年

仲秋記 陳張正見季子廟詩延州高讓遠傳芳世

祀移地絕遺金路松悲懸劍枝野藤侵藻井山雨濕

苔碑別有觀風處樂奏無人知  
北周無名法師徐  
君墓詩延陵上國返枉道過徐公  
死生命忽異懽娛  
意不同始往邛山北聊踐平陵東  
徒解千金劍終恨  
九泉空日盡荒郊外烟生松栢中  
何言愁寂寞日暮  
白楊風  
元李謙過徐君墓詩瘠鹵豐茅管荒林翳  
荆棘此地果何地云有徐君域當年吳公子過此聘  
上國心交固已許一劍非可惜豈期輶車還君已掩  
窆空撫摩三尺鐵欲交知無及惟有挂劍樹此恨庸

可釋精誠達泉壤千載未容息至今地效靈化為異  
草碧采采不忍去觀此疑今昔今人交面顏昔人示  
胸臆胸臆久益堅面顏徒外飾我詩志其墓匪獨吊  
陳迹百世聞高風衰俗庶可激 明吳郡楊基挂劍  
臺歌語諾諾尚淺死諾諾更深當時季子意即是徐  
君心嗟嗟徐君骨已朽寶劍摩挲在吾手正擬臨岐  
解贈君不意挂君墳上柳挂劍果何益聊以明不欺  
當時讓國心肯使徐君疑於乎劍可折臺可隳死生

之諾不可虧 會稽唐肅挂劍冢詩季子讓一國視  
之敝屣然寧當寶一劍不為徐君捐徐君雖亡骨未  
朽挂劍墳前向楊柳君知知不足悲我心許君終  
不移 山陰王懌過徐君墓詩黃河流水幾清渾斷  
碣殘碑尚有文塚樹不懸當日劍空留啼鳥向斜曛  
曾嶼挂劍臺詩有吳季子鮮儔侶當世翩翩若霞  
舉帶劍聘魯過徐君徐君色欲子心許還車不見君  
顏色挂劍墓木空延佇君不聞雷氏發劍酬所辟子

胥解劍求脫楚紛紛盡為生前謀誰視幽明同爾汝  
至今神物不磨滅化作異草人爭貯異草何功爭貯  
之心疾不瘳須一茹楊郎好古攜我遊遲迴嘆息沿  
清渚嗚乎高誼千古在薄夫惡俗應消沮 李東陽  
詩長劍許烈士寸心報知已死者豈必知我心元不  
死平生讓國心耿耿方在此 濮陽李先芳詩口諾  
不如心諾深徐君之意季子心壯遊未畢徐君死寶  
劍匣中悲知已掛汝墳頭高樹枝寧論地下知不知

王謳拜吳季子祠詩二首  
荒丘摧蘚木挂劍獨遺  
枝白晝雲山古青春鳥雀悲  
居人收異草過客讀殘  
碑心許顧如此應為浮世嗤  
陵谷千年改遺祠宿  
莽中孤墳無短劍暮野但悲風  
亂草生春碧啼鵑灑  
血紅傷心誰共此落日向衰翁  
謝肇淛挂劍臺詩  
察君欲劍色未諾心相許  
生死良不渝枯殺墳頭樹  
只今遺廟枕孤墳寸草青青帶劍文  
過客秋風奠蘋藻汶河西逝水連雲

戊己山在鎮城北顯惠廟後弘治間塞決河成通政  
韓鼎築之下臨龍潭取土制水之義名曰戊己云

明麻城劉天和九日登戊己山詩四首野色依微近  
藤花掩映開丹房驚鶴夢白日向人來鼓吹聲初動  
松杉影自迴十年懷地主乘月共登臺迤邐尋幽  
徑還登最上臺河流聲共渺野色首頻迴誰訝湘雲  
遠相將楚客才論詩動幽興籬菊若為開 歸路山  
雲合褰裳野徑開微風迎鶴舞滴露傍松來詩癖頻

拈句情深不記迴夜闌人語寂一笑下重臺 暝色  
迷幽境黃花滿砌臺片帆秋共遠短棹夜仍迴落照  
依人近征鴻入望來故鄉千里思對月酒重開 許  
用中詩古廟松杉裏崔嵬皓月臺山從碣石斷水自  
海門迴障霧重崖宿驚濤孤嶼開檣帆問行客誰是  
濟川才 秀水沈謐詩初春乘晚眺細雨踏花遊古  
洞空丹府平沙見帝丘水深魚戲藻天濶鳥盤樓勝  
槩人難遇何妨竟日留 福唐葉向高過安平謝水



部在杭招飲戊己山亭詩二首孤亭突兀倚城樓烟  
樹微茫入望收地圻洪流迷禹跡山迴重鎮壯神州  
寒空鴈去闕河暮遠浦葭生水國秋直北長安天尺  
五浮雲不散古今愁不惜芳尊此地攜平蕪秋色  
晚淒淒荒村烟火梁山下落日帆檣濟水西聖代無  
勞沉壁馬使臣應自紀河隄在杭時新纂北河記登臨欲問前  
朝事陵谷于今半已迷雲間馮時可同謝在杭登  
戊己山詩二首河通南北奠神鰲壁馬沉來水恠逃

千里王功殊濯濯百年民力亦勞勞  
溪花含吐如半醉林葉蒼黃似二毛  
冠蓋往來徒自苦浮名天地一秋毫  
異鄉天地一登臺矯首浮雲萬里開  
重鎮關河明自壯梁山寇盜宋堪哀  
寒空鴈鷺爭霞去濁水魚龍引浪來  
自挾仙郎相唱和古今感慨亦悠哉  
無為劉汝佳過張秋謝在杭招飲山亭  
詩霽晚憑高四望賒蕭蕭秋色敞平沙  
銜盃綺席歸鴻度緩帶孤亭落照斜  
萬里餘艎飛曉月千尋雉堞鎖晴霞  
使君

治水饒休暇乘興何妨客泛槎  
謝肇淛登戊己山  
感事詩龍潭東注後禹力至今存水恠庚辰鎖山形  
戊己尊雲帆千里目桑柘萬家村莫問前朝事孤城  
有浪痕

黑龍潭在鎮城北半里許一名平河泉故黃河決口  
也東流既塞泉涌地中匯而為潭深不可測大旱不  
枯相傳有龍潛焉嘉靖初郎中楊旦飲其地欲涸而  
觀之水決未半風雷大作舟皆覆沒楊迺懼而祭之

明福寧崔世召謝水部招集黑龍潭詩水部風流  
白接羅黑龍潭畔共金卮沙明野色雲千頃風約池  
痕月半規柳黛正肥鶯漸老荷香未透客先知獨餘  
一種清狂在爛醉從教兩鬢絲 謝肇淛與崔徵仲  
孝廉飲黑龍潭詩天吳驅雷雲冥冥崑崙西下建高  
瓠一泓灌盡沃焦土枯槎猶帶龍涎腥神物千年睡  
不起銀盤堆出空青裏十里芙蓉五里苔花落花開  
藕根死與君共醉卧漁磯苔色荷香滿素衣梁山日

落孤城晚探得驪珠照乘歸

阿井在故阿城內水經注曰阿城北門西側阜上有井其巨若輪深六丈歲常煮膠以貢天府禹貢傳曰東阿濟水所經取其井水煮膠謂之阿膠用攪濁則清服之下鬲疏痰今其水不盈數尺色綠而重阿膠歲解藩司入貢其法用黑驢皮加鹿角二十之一以桑火煮之黑可以鑒者佳井覆以亭歲時有司封閉明寧陽許彬重修阿井記充之東阿陽穀縣界古

阿城內舊有井一泓濶圍如車輪名曰阿井泉水清冽甘美鄰境汲以熬膠供國用者歲以為常先是井亭傾圯泉源涸溢兗州守郭鑑率州屬僦工甃石及泉復亭其上其北建亭三楹為官僚往來棲息之所繚以週垣闢以門徑經始於九月之望落成於十月之朔太守具其事授予屬為之記攷之於古井者清也謂泉之清冽山之精氣所發也爾雅謂改邑不改井井以不變為德若蘇耽之橘井陸羽之茶井葛洪

之丹井皆是已李白云古甃冷蒼苔寒泉湛明月杜  
甫云月峽瞿塘雲作頂亂石崢嶸俗無井蓋井之見  
重於世而致詞人之詠誦也如是況茲井自古及今  
清冽不變制良劑以延年上供國用而下利民生豈  
淺鮮哉是宜記之以告於東魯俾毋褻焉 李際元  
阿井詩九仞天開甃一泓味出常和膠供上國排劑  
表仙方液靜丹砂冷珠浮碧玉香構亭珍造化不為  
納清涼 謝肇淛詩濟水伏流三百里迸出珠泉不

盈尺銀牀玉甃閉蒼苔餘瀝爭分青石髓人言此水  
重且甘踈風止血仍祛痰黑驢皮革山柘火靈膠不  
脛馳郵函屠兒剗剥如山積官司催取頻飛檄驛騎  
紅塵白日奔天札疲瘡竟何益我來珍重勤封閉免  
造業錢充餽遺任他自息仍自消還却靈源與天地  
桃丘在鎮東北十八里春秋桓公十年會衛侯于桃  
丘即此今為桃城鋪鋪旁一丘高可數仞每陰雨後  
烟霞中隱隱有市井車馬之形土人以為蜃市云



明謝肇淛詩桃丘一坏土高與培塿齊古道無人烟  
芳草何萋萋會盟有遺壘介駟猶疑嘶風雨晦林薄  
倏忽幻虹霓精靈不可測市語非無稽不見海上山  
空中聞天雞

釣臺山在鎮東南二十五里山多碎石若魚蟹狀其  
麓有釣磯相傳嚴子陵釣魚處石上有雙趺痕離此  
不遠有子陵臺考之漢書但言子陵釣大澤中而不  
言所在未知是否 明謝肇淛詩驅車東南巔苔阜

卷二  
俯清泚危石蘆花中隱隱趺雙履云是嚴子陵披裘釣於此只今砂礫形魚蟹紛相似清風渺莫攀丘壑徒為爾擾擾風塵間客星竟誰是

金堤在鎮城南堤墳隆起延亘鄆濮俗稱始皇堤漢文帝時河決酸棗東潰金堤即此或云即漢王景所修汴渠堤自滎陽至千乘海口千餘里此其故址未知是否按別傳云始皇堤二屹壽張范縣之中一以障河之南徙一以為馳道至東海求神仙疑此為秦

築者近是 明殷雲霄大堤詩二首北隄楊柳綠絲  
烟更有桃花紅可憐攜酒邀我南隣去憐他美酒不  
索錢 南隄北隄布穀飛隄邊禾黍青離離隄上野  
花開復落隄下行人行不稀 謝肇淛始皇堤詩穹  
虹亘神臯哀湍齧其足百恠互簸騰崇墉維坤軸南  
流匯汶泗西走延鄆濮屹若金石鞏神功駭盱矚云  
是嬴政時東巡納大麓馳道象天闕畚鍤周四瀆玉  
輦春復秋千里遙相屬既登之杲封復窮蓬來躅東

海何茫茫引領望徐福那知瀉池君竟祕沙丘積霸  
業久烟沉遺址猶雲矗輦路無人行春風草空綠怒  
瀾既東迴迢遞黃龍舳誰念作者勞千載為陵谷懷  
古更惆悵鴉啼寒城曲

龐眉井在鎮東數里方圓七十二眼俱以琉璃甃之  
名曰琉璃井相傳龐涓所開又其東三里許有孫臏  
營明謝肇淛詩沙埋白骨草沉碑戍壘蕭蕭落日  
遲關智爭雄渾似夢西風七十二琉璃



北河紀餘卷二